

Jialataexl Sul

1

Zzasoso Dae Biex

¹ Ngo mel Barloxr a. Ngo Yisu Zidu miardal dae ca bei a mel, ca ar mel leil koxl dae bbeixsael ca ar ddei leil koxl dae a bei nr nga, Yisu Zidu nei Arbbor Arbosobo ngo leil bei lol arddeir a. Arbosobo mel dder Yisu si a yoxl yar leil gol du xixl lei lol su ddei nga a. ² Jialataexl mermi jiaxlhuixl gga ca mel, ngo nei ngo dax cirgo a hher dae arzzi-nimar arzzi-nimo maelmaerjia lei nia leil xil vaexr gger.

³ Niul ddei Arbbor Arbosobo nei Seirpor Yisu Zidu nia leil cirza-hanga meixl gger lol nia, nia leil nixmox zzaso lol nia. ⁴ Yisu mel niul ddei Arbbor Arbosobo xiar dae mel sael a bei a, niul zuixl bei goxr mel leil weix a, armael ddei olga ddei pixl a. Yar eine bei a mel, niul leil zuixl mel gga jiuxl teixl lei niazzir a nga arddeir a. ⁵ Arbosobo leil mel cirse-cirsil lei middux lol nia. Amae.

Yisu Leil Biar Dae Ddar Seirseir Mel, Cir Yoxr Lar Zza

⁶ Zidu mel niul leil weix a si a. Eil ddei mel dder yar niul leil cirza-hanga seirseir meixl gger dae ddei nga a. Yel Arbosobo eil ddei leil ngol dae a, nia leil tiur teixl lei a. Nael ngo xiar lei xiar nr ci, eine cirleixr dder nia yar dax bei nr mae, kebal ddar seirseir ar yoxr leil ddarzzi ssi. ⁷ Nael, yarzi bbeix, kebal mel zeixleixr lei ddar seirseir ar yoxr nr zza. Ca cirmelmel a Zidu leil biar dae ddar seirseir mel nr hoxr gier mal gger a, nia leil fur. ⁸ Ngua bbeixsael merhhexr gga zei lei tisir mel nga zzorbbeixlei, nia leil kebal ddar seirseir ar yoxr biar gger a, halleix ngua nia leil biar gger goxr mel dax ciryoxr a nr nga arddeirnga a mel,

Arbosobo yaa leil faxr a, dixlyuxl gga ssi lol nia! ⁹ Eil mel mel ngua nia leil bbeix gger goxr ho a; nael ngo yoxl zeixeixr nia leil ar boxl bbeix gger. Azo ca nga zzorbbeixlei, yar nia leil kebal ddar seirseir ar yoxr biar gger a, halleix nia bbejjiur goxr mel dax ciryoxr a nr nga a mel, yar leil dder dixlyuxl gga ssi lol nia!

¹⁰ Ngo eine bbeix a, ca mel leil ngo leil kuar gger lol bbeixsael Arbosobo leil ngo leil kuar gger lol nia neil? Ngo halae ca mel leil ggese lol niazzir arddeirnga a, ngo dder Zidu leil visser su ca nr nga a. Yel ngo ca mel leil ggese lol dae nr nga.

Barloxr Arsae Yisu Miardal Dae Ca Loxr

¹¹ Arzzi-nimar arzzi-nimo mel ngo nia leil saexl lol nia, ngo ca leil biar gger dae Yisu Zidu leil biar dae ddar seirseir eil mel mel, ca xiar teixl lei nr nga. ¹² Ca mel ngo leil biar gger nei mul gger nr nga a nei, Yisu Zidu ngo leil saexl lol arddeir a.

¹³ Ngo halleix ngua Yoxrtaexl su ca mel ddarzzi dae hal mel leil ddarzzi a, ngo ca mu a arsae mu mel, nia lei saexl. Ngo Arbosobo ddei jiaxlhuixl gga hherdder Yisu leil ddarzzi su ca mel leil arsae bixr no kor bixr goxr, arsae ke no kor ke goxr a mel, nia lei saexl. ¹⁴ Ngo zabbar seirseir arla ngua porpor mel ddei leiddur mel dax bei mae dae, bir ngo dax koxltor ciryoxr a nga Yoxrtaexl su ca mel leil bei miur. ¹⁵ Nael Arbosobo mel ngo leil seirseir meixl gger a, ngo ngama xilbe gga hher ji dae seir dder yar ngo leil tiur ho a; yar ngo leil yar leil visser lol. ¹⁶ Yar mel ngo leil Yoxrtaexl su nr nga ca mel leil Yisu Zidu leil biar dae ddar seirseir mel biar gger ssi lol, yel yar ngo leil yar Ssor Yisu Zidu ddei leil saexl lol ggese. Yar ngo leil eine bei lol a mel, ngo azo ca dax lei zzibbe nr goxr.

¹⁷ Ngo xilmeir leil dder Yisu Zidu miardal dae ca bei ho hal mel Yiluxlsaler zzi gga hher dae. Nael ngo yaa dax nr ssi, Alaboxr mermi ssi, giedae yoxl Daxlmarsixlgexr zzi gga jjixr.

¹⁸ So koxl goxr ho a sael ngo Yiluxlsaler zzi gga ssi a, Birdaexr leil i ssi. Ngo yar dax cirgo a ceingor ni hher a. ¹⁹ Halgielggur mel, ngo Birdaexr leil nei Seirpor ddei nimar Yargel leil lar mia, Yisu Zidu miardal dae ca kebal hal mel leil nr mia. ²⁰ Ngo nia leil vaexr gger dae ddar eil mel nia leil fur nr nga, yarzi a. Arbosobo meixsaer qier leil lei ngo bbeix bel.

²¹ Giedae ngo Xuexllixlyal mermi nei Jilixljia mermi ssi ci a. ²² Halcar a, Yoxrtaexl mermi jiaxlhuixl gga ca mel ngo leil mia nr goxr seir. ²³ Nael yaa si biar ggie bbejjiur a bbeix: “Halleix niul leil Yisu Zidu leil biar dae ddar seirseir mel leil ddarzzi lol nia-nr-zzir a, niul leil bixr goxr su ca hal ddei mel, ddar seirseir eil mel ca leil biar gger dae a” zzor. ²⁴ Yel yaa ngo bei dae mel leil saexl a dder Arbosobo leil bbeix zae gger a.

2

Barloxr Nei Kebal Yisu Miardal Dae Ca Mel

¹ Giedae ceili koxl goxr ho a, ngo yoxl Yiluxlsaler zzi gga ssi. Banaxrba ngo dax cirgo a ssi; Tixrdo lei ca dae. ² Ngo Yiluxlsaler zzi gga ssi a mel, Arbosobo ngo leil ssi lol arddeir a. Ngo mel jiaxlhuixl gga vaervaerpor mel leil i ssi.^a Yel ngo Yisu Zidu ddei ddar seirseir mel Yoxrtaexl su nr nga ca mel leil arsae biar gger mel, yaa leil saexl lol nia. Nr nga a, yaa ngo leil dir arddeirnga a, ngo eilleix bei dae nei halleix bei goxr miar mel baexr a bei lei a gexr. ³ Nael ngua dax cirgo a ssi su Tixrdo ddei mel Yoxrtaexl su ca nr nga Xilaxl su ca a gelir bei nr goxr bbeixarnar, jiaxlhuixl vaervaerpor mel lei Yoxrtaexl su ddei leiddur mel dax zox dae a, yar leil ddoddo-nrddo gelir nr bei lol. ⁴ Nael ca ar mel a Yisu leil ddarzzi laexl a, arjjiuljjiu a jiaxlhuixl gga ddir lei a. Yaa mel ddartalsu

^a2:2 *Ngo mel jiaxlhuixl gga vaervaerpor mel leil i ssi. Ca eil mel Yisu leil ddarzzi su Yoxrtaexl su ca a.*

mel sael a pa dil lei a, niul Yisu Zidu leil ddarzzi su ca mel arsae armael lozza tal lei a. Yaa ddoddo-nrddo ngua leil Yoxrtaexl su ddei leiddur mel bei lol a, zebol sael a loxr lol niazzir.⁵ Nael ngua mel nia leil Yisu Zidu leil biar dae ddar seirseir yarzi mel leil ddarzzi zei si lol niazzir a dder yaa leil bei nr leixl lol, yaa dax cirdoxr lei bei nr mae.

⁶Arbosobo mel ca nr i, yel jiaxlhuixl gga ca mel vaervaerpor nga nga nr nga lei ngo dax guaxr-nr-zoxr. Yarzi middux vaervaerpor hal mel lei ngo leil ddar biar a arsae biar nia bbeix nr goxr.⁷⁻⁸ Doxgoxleixr, Arbosobo mel ngo leil Yisu Zidu miardal dae ca ddei bei lol a, ngo leil Yoxrtaexl su nr nga ca mel leil, Yisu leil biar dae ddar seirseir biar gger ssi lol yaa i teixl lei a. Hherdder Arbosobo Birdaexr leil Yisu miardal dae ca ddei bei lol a, yar leil Yoxrtaexl su ca mel leil Yisu leil biar dae ddar seirseir biar gger ssi lol sael a nga.⁹ Yargel, Birdaexr nei Yuehal yaa soler mel jiaxlhuixl gga vaervaerpor yarzi middux mel nga a; hherdder xi gga sseigu sael a nga. Yaa Arbosobo ngo leil seirseir meixl gger a, ngo leil miar yarzi zoxlyoxl eil ddei bei lol saexl ho a, ngua dder miar bei carbeix loxr a. Yel yaa ngo nei Banaxrba leil Yoxrtaexl su nr nga ca mel dax miar bei ssi lol ddarkoxl a. Yaa nael, Yoxrtaexl su ca mel dax miar bei dae.¹⁰ Yaa ngua leil “Nia casolssor mel leil beijjiu holcir dae nia,” eine lar bbeix. Yaa bbeix dae eil ddei mel hherdder ngo zabbar seirseir arla bei niazzir dae ddei nga a.

Barloxr Birdaexr Leil Bota

¹¹Giedae Birdaexr Atixr'a zzi gga lei ci a, botaddu zza a, ngo dder daxmeix yar leil bota.¹² Yar mel Yargel miardal si lei ca hal mel lei nr ci seir car, Yisu leil ddarzzi su Yoxrtaexl su nr nga ca hal mel dax cirgo a zzo zzor dae. Nael ca hal mel lei ci ho a, yar dder gelir bei nia bbeix su ca mel leil gexr a, zuxl xixl si a, zeixleixr Yoxrtaexl su nr nga ca hal mel dax nr naer a.¹³ Yisu leil ddarzzi su kebal Yoxrtaexl su ca hal mel lei

Birdaexr sael a bei laexl; Banaxrba jiujiu yaa sael a bei laexl. ¹⁴ Ngo mel yaa Yisu leil biar dae dder seirseir yarzi mel dax bei nr mae dae i teixl lei a dder ca mel meixsaer qier leil Birdaexr leil bbeix: “Ni Yoxrtaexl su ca a lei, nixixl goxr a, Yoxrtaexl su nr nga ca mel sael a goxr dae lalnga. Eine nga a, ni arsaenga a halae ddoddo-nrddo Yoxrtaexl su nr nga ca mel leil Yoxrtaexl su ca mel sael a nixixl goxr lol neil?”

Arbosobo Arsae Ca Leil Zuixl Nr Zza I Mal Gger

¹⁵ “Niul mel xiu teixl lei a dder Yoxrtaexl su ca a. Yoxrtaexl su nr nga zuixl zza ca hal mel nr nga.” ^{b 16} Nael niul saexl Arbosobo niul leil zuixl nr zza i mal gger a mel, niul Moxrxi ddei Lixlfaxr dax bei mae dae nr nga a nei, Yisu Zidu leil ddarzzi a nga arddeir a. Azo ca lei Lixlfaxr dax bei mae dae a, Arbosobo yar leil zuixl nr zza i mal gger nr var, yel niul lei Yisu Zidu leil ddarzzi a, Arbosobo niul leil zuixl nr zza i mal gger.

¹⁷ Niul Zidu leil ddarzzi a Arbosobo niul leil zuixl nr zza i mal gger ho a; nael niul Lixlfaxr nr bei a zuixl zza seir arddeirnga a, holbbaexl Zidu niul leil zuixl bei ssi lol a ngo? Eine mel arsae var bbeixleir? ¹⁸ Ngo bbeix, Lixlfaxr ddei dax bei mae dae a saelnei Arbosobo niul leil jiuxl var, eine bbeix arddeirnga a, ngo dder yarzi zuixl bei su ca a. ¹⁹ Ngo Lixlfaxr dax bei mae dae a maelmaerjjia bei ci nr xie a, Lixlfaxr ddei ngo leil zuixl dixl gger a. Yel ngo zeixleixr Lixlfaxr dax bei nr mae, Arbosobo leil weix a gol dae. ²⁰ Ngo Zidu dax cirgo a sixrzixljiaxl leil diexr gex dae ho sael a nga a. Yel eilcar ngo gol dae a mel, armael gol dae nr nga a nei, Zidu ngo

^{b 2:15} *Niul mel xiu teixl lei a dder Yoxrtaexl su ca a. Yoxrtaexl su nr nga zuixl zza ca hal mel nr nga* Barloxr ddei yilsi mel dder bbeix, Yoxrtaexl su ca mel Arbosobo leil saexl, yar ddei dder lei saexl, yel Arbosobo leil lar zi, zuixl bei nr meixr. Nael Yoxrtaexl su nr nga ca mel Arbosobo leil nr saexl, yar ddei dder lei nr saexl, yel bbex leil zi, zuixl bei meixr.

nixmox zzar gol ji dae arddeir a. Halae eilcar a, ngo gol dae a lei, ngo Arbosobo ddei Ssor ddei leil ddarzzi a gol dae arddeir a. Yar mel ngo leil perniar a, ngo leil weix a yar ddei olga ddei pixl a. ²¹ Ngo Arbosobo ngo leil seirseir meixl gger dae eil mel bei pixl nr gger. Ca mel Lixlfaxr dax bei mae dae a, Arbosobo dder yaa leil zuixl nr zza ca i mal gger arddeirnga a, halmel, Zidu halae si a azo bei bbeixleir?”

3

Lixlfaxr Dax Bei Mae Bbeixsael Yisu Leil Ddarzzi

¹ Jialataexl mermi su ca mel, nia arsae eine medeil leir? Arseir yoxl nia leil fur a leir? Yisu Zidu niul leil weix a sixrzixljiaxl leil diexr zil a mel, ngo nia leil zabbar seirseir a biar gger ho a; hherdder nia lei i lol sael a nga a mar! ² Eilcar a, nia ngo leil ddarkoxl la. Arbosobo ddei Xiu ddei nia nixmox zzar hher ji dae a mel, nia Lixlfaxr dax bei mae dae a nga, bbeixsael nia Yisu leil biar dae ddar seirseir mel leil bbejjiur a, ddarzzi a nga neil? ³ Nia arsae einezeixl medeil leir? Nia Yisu leil ddarzzi beil car mel, nia Arbosobo ddei Xiu ddei dax bei mae dae. Nael eilboxl nia ca xiar dae mel dax bei mae a ngo? ⁴ Nia hormo goxr sol a lei baexr a goxr sol a ngo?^c Nr nga piar a mar! ⁵ Halmel, Arbosobo nia leil yar ddei Xiu ddei gger nei nia dax ddoddomo bei a mel, nia Lixlfaxr dax bei mae dae a nga, bbeixsael nia Yisu leil biar dae ddar seirseir mel leil bbejjiur a, ddarzzi a nga neil?

⁶ Arbosobo Ddei Sul ber leil vaexr dae a bbeix: “Yalboxrlahar mel

^c**3:4** *Nia hormo goxr sol a lei baexr a goxr sol a ngo?* Halleix ca eil mel Yisu leil ddarzzi a hormo goxr sol goxr a. Nael eilleix yaa zeixleixr ddar-nr-zzi arddeirnga a mel, halleix goxr sol dae mel lei baexr a goxr sol lalnga a.

Arbosobo leil ddarzzi a, Arbosobo dder yar leil zuixl nr zza i mal gger a.”^{d 7} Yel nia saexl nia, Arbosobo leil ddarzzi su ca hazza mel dder yarzi Yalboxrlahar ddei giedae ca nga a. ⁸ Arbosobo mel arddol-cirsil dder yar ddei sul ber gga vaexr dae a bbeix, Yoxrtaexl su nr nga ca mel lei yar leil ddarzzi a, yar yaa leil zuixl nr zza i mal gger. Yar dder seirseir eil mel Yalboxrlahar leil biar gger a bbeix: “Ngo ni leil ngol dae a, mer woxrke ca circuxr-hanga leil seir lol nia.” ⁹ Yel ha Yalboxrlahar sael a ddarzzi su ca mel, Arbosobo dder yaa leil Yalboxrlahar dax ciryoxr a seir lol nia.

¹⁰ Arbosobo Ddei Sul ber leil yoxl bbeix: “Ha Lixlfaxr leil vaexr dae mel dax bei nr mae ardoxr zza a mel dder Arbosobo yaa leil dixlyuxl gga ssi lol nia,” eine bbeix a. Yel Lixlfaxr dax bei mae dae a, Arbosobo yaa leil jiuxl lol niazzir su ca mel bei nr mae ardoxr zza arddeirnga a, Arbosobo dder yaa leil faxr a, dixlyuxl gga ssi lol var. ¹¹ Arbosobo Ddei Sul ber leil bbeix: “Arbosobo mel yar leil ddarzzi su ca mel leil zuixl nr zza i mal gger a, yaa dder cirse-cirsil olga zza,” eine bbeix a. Yel arseir lei saexl, azo ca lei Lixlfaxr leil koxl dae a mel, Arbosobo yar leil zuixl nr zza i mal nr gger. ¹² Lixlfaxr dax bei mae nei Yisu leil ddarzzi eil nr yoxr mel zzi dax guaxr-nr-zoxr. Arbosobo Ddei Sul ber leil yoxl bbeix: “Arseir Lixlfaxr dax bei mae gaxzi a mel, yaa dder cirse-cirsil olga zza,” eine bbeix a. ¹³ Arbosobo Ddei Sul ber leil halae bbeix: “Ha sixlerte leil diexr zil dae ca mel dder Arbosobo yar leil faxr dae ca mel nga a,” eine bbeix a. Yel Zidu niul leil weix a sixrzixljiaxl ddei leil si a Arbosobo niul leil faxr dae hal mel yar armael oldde leil ddeix ho a. Yar dder niul leil vae xixl lei a, Lixlfaxr ddei zeixleixr niul leil guaxr nr gex dae a. ¹⁴ Arbosobo eine bei a mel, yar Yalboxrlahar leil seir lol hal mel, Yisu Zidu leil sser dae a, Yoxrtaexl su nr nga ca mel leil lei li wo lol niazzir a nga arddeir a. Eine nga a, niul ddarzzi a dder Arbosobo ddei Xiu ddei li wo ddo. Eil ddei mel

^d3:6 Cuaxlsixljil Sul 15:6 leil vaexr dae.

Arbosobo bbeix har zaxr goxr ddei nga a.

Lixlfaxr Nei Arbosobo Bbeix Har Zaxr Goxr

¹⁵ Arzzi-nimar arzzi-nimo, bir dae a bbeix: ca nnel a mel arsaе bei nia dixl har ho a, yel dder sul leil vaexr zeі lei a. Eine nga a mel dder arseir lei ardoxr vaexr deix dax gger bbeixsael ardoxr bei pixl gger nr cexr.

¹⁶ Ciryoxr a nga, Arbosobo Yalboxrlahar nei yar giedae ca ddei dax bbeix har zaxr goxr ho a. Arbosobo Ddei Sul ber leil vaexr dae a bbeix: “Ni giedae ca cirke” bbeix dae nr nga a nei, “Ni giedae ca ddei dax” eine bbeix dae lalnga. Eine bbeix ddei yilsi mel dder ca cir ddei leil lar bbeix. Yar giedae ca eil ddei mel dder Zidu nga a. ¹⁷ Ngo ddei yilsi mel dder bbeix: Arbosobo bbeix har zaxr goxr^e mel lixiu socei koxl loxr ho a saelnei yar Moxrxi leil Lixlfaxr bbeix gger seir, yel Lixlfaxr mel yar bbeix har zaxr goxr hal mel leil bei pixl gger nr ddo. Arbosobo bbeix har zaxr goxr a mel, arsaеbeilei bei ci nia. ¹⁸ Arbosobo Yalboxrlahar leil seir lol a mel, yar Yalboxrlahar dax bbeix har zzar goxr. Ciryoxr a nga, niul Arbosobo niul leil seir lol mel li wo a mel, niul Lixlfaxr dax bei mae dae a li wo nr nga a nei, Arbosobo bbeix har zaxr goxr a li wo arddeir a.

¹⁹⁻²⁰ Halmel, arsaenga a Arbosobo Moxrxi leil Lixlfaxr bbeix gger neil? Ca mel leil yaa zuixl zza saexl lol a nga arddeir a. Arbosobo Moxrxi leil Lixlfaxr bbeix gger car a, yar tisir leil ngol dae a, Moxrxi leil bbeix gger. Moxrxi mel dder Arbosobo nei ca mel aga ca ddei nga a. Aga ca ddei mel nr piar jjia leil lei guaxrzoxr. Nael Arbosobo mel cir ddei lar nga.^f

^e**3:17** *Arbosobo bbeix har zaxr goxr* Arbosobo bbeix har zaxr goxr ddei mel dder Arbosobo Yalboxrlahar leil nei yar giedae ca mel leil seir lol, halae Yalboxrlahar leil sser dae a middurbbor circuxr-hanga leil seir lol.

^f**3:19-20** *Nael Arbosobo mel cir ddei lar nga.* Ca cirmelmel a zzir dae a ddar eil qier ddei yilsi mel dder Arbosobo Yalboxrlahar dax bbeix har

Arbosobo Lixlfaxr gger a mel Zidu lei hane zzezze sser ci. Yar mel dder Arbosobo Yalboxrlahar dax bbeix har zaxr dae giedae ca hal ddei nga a.

²¹ Eine nga a, holbbaexl Lixlfaxr ddei mel Arbosobo bbeix har zaxr goxr ddei leil dir a ngo? Eine mel arsae nga var bbeixleir? Ca mel Lixlfaxr dax bei mae dae a cirse-cirsil lei Arbosobo dax cirgo a goxr dae cexr arddeirnga a mel, ca mel Lixlfaxr leil koxl dae a, Arbosobo dder yaa leil zuixl nr zza ca i mal gger cexr a. ²² Nael Arbosobo Ddei Sul ber leil bbeix: Arseir lei zuixl cirdoxr lei nr bei ssi nr var. Yel ca mel Yisu Zidu leil ddarzzi a saelnei Arbosobo yaa leil gger nia bbeix har zaxr goxr hal mel li wo ddo.

²³ Nael niul Zidu leil ddarzzi zi nr ci seir halleix mel, Lixlfaxr ddei niul leil guaxr gex dae a, niul leil ge ji dae sael a nga. Hherdder Arbosobo niul leil Zidu leil ddarzzi nia saexl lol hane zzezze ci. ²⁴ Eine nga a, Lixlfaxr ddei mel niul leil guaxr dae a Zidu lei zzezze ci, hherdder niul Zidu leil ddarzzi a Arbosobo niul leil zuixl nr zza i mal gger zzezze ci. ²⁵ Eilboxl mel, niul Zidu leil ddarzzi zi ci a. Yel Lixlfaxr ddei dder niul leil guaxr nr gex dae a.

Arbosobo Ddei Ssormine

²⁶ Nia mel Yisu Zidu leil ddarzzi a dder maelmaerjia lei Arbosobo ddei ssormine loxr ho a. ²⁷ Ha sexlsir ho ca mel dder Zidu dax hher ji dae a, yar dder Zidu leisel a. ²⁸ Nia mel Yisu Zidu leil ddarzzi a, yar dax hher ji dae ho a. Yel nia dder Yoxrtaexl su ca bbeixsael Xilaxl su ca, zebol mu su ca bbeixsael armael lozza su ca, capor bbeixsael ssormaer eine nr bbe a. ²⁹ Nia Zidu ddei ca nga a mel, nia dder Yalboxrlahar giedae ca mel

zaxr dae halcar aga ca nr sser.

⁹**3:27** Ha Yisu Zidu leil ddarzzi a mel dder jiuxl wo ho a. Yisu leil ddarzzi su cirddeir-hanga lei sexlsir mibbe.

nga a. Yel nia dder Arbosobo Yalboxrlahar leil gger nia bbeix har zaxr goxr mel li wo ddo.

4

¹ Bir dae a bbeix, anix ar ddei a leixrmeir ar fel li wo ddo bbeix har zaxr dae a. Anix eil ddei leixrmeir eil fel li wo su ca ddei nga bbeixarnar, nael yar ca vaer nr loxr hozze mel, li wo nr ddo, yar zebol mu su mel dax ciryoxr a nga. ² Yar ye seir a mel, ake guaxr gger su yar leil guaxr gex dae. Hherdder yarbbor dixl har dae nixixl hal cir ni zzeze ci. ³ Yel niul Yisu leil ddar-nr-zzi seir mel, anix hal ddei dax ciryoxr a nga; middurbbor ddei cirza-hanga leiddur mel dax bei mae dae nia. ⁴ Nael Arbosobo dixl har dae nixixl hal cir ni ci a mel, yar dder yar ddei Ssor ddei leil miardal si lei a, ssormaer ar ddei leil yar leil xiu lol.^h Xiu teixl lei ho a, yar leil Lixlfaxr dax bei mae dae lol. ⁵ Arbosobo eine bei a mel, Lixlfaxr guaxr gex dae ca maelmaerjia leil jiuxl teixl lei a, niul leil yar ddei ssormine loxr lol niazzi a nga arddeir a. ⁶ Niul mel Arbosobo ddei ssormine loxr ho a, yar dder yar Ssor ddei Xiu ddei leil niul nixmox zzar hher ji dae lol a, niul leil yar leil “Abaxlⁱ Arbbor!” ae lol. ⁷ Hane nga a, ni dder zeixleixr zebol nr nga a; Arbosobo ddei ssormine nga a. Yel ni dder yar, yar ssormine mel leil gger dae cirza-hanga mel li wo ddo.

Barloxr Jialataexl Su Ca Mel Leil Perniar

⁸ Halleix, nia mel Arbosobo leil nr saexl a, nia dder Arbosobo nr nga neir hal mel ddei zebol bei. ⁹ Nael eilboxl, nia mel Arbosobo leil saexl ho a; hherdder Arbosobo nia leil saexl ho a. Nia arsaenga a halae middurbbor cirza-hanga leiddur mel dax bei mae dae neil? Holbbaexl nia

^h4:4 Martaexl Sul 1:18-25 nei Luxljia Sul 2:1-20 leil biar dae.

ⁱ4:6 *Abaxl*/Abaxl ddei yilsi mel dder arbbor.

zeixleixr zebol mu niazzir dae a ngo? ¹⁰ Nia Arbosobo leil ggese lol niazzir a, azo nixixl, azo xiu, azo jiax, azo koxl goxr eil zzu dax goxr mae doxr dae. ¹¹ Ngo nia leil yarzi zoxrzixr gger, ngo nia dax miar bei dae mel lei baexr a bei lei a gexr. ¹² Arzzi-nimar arzzi-nimo mel, ngo nia dax ciryoxr a loxr ho a, yel eilcar a ngo nia leil qiuxr, nia lei ngo dax ciryoxr a loxr nia.^j

Nia mel ngo dax yixrsixr nr zza hal mel bei nr goxr. ¹³ Nia lei saexl, halleix ngo, ngo no dae car a leil jiux a, nia leil Yisu leil biar dae ddar seirseir mel biar gger beil a. ¹⁴ Ngo no halcar a, nia leil yarzi maxrfaxr bbeixarnar, nael nia halae ngo leil vuxr-nr-yixr, ngo leil ggaxr teixl nr gger. Doxgoxleixr, nia ngo leil hexl, hherdder nia Arbosobo ddei tisir bbeixsael Yisu Zidu leil hexl mel sael a hexl. ¹⁵ Halleix mel, nia einezeixl ggese, nael eilleix nia arsae nga a leir? Ngo bbeix bel, halcar a nia ddei meixddur zze giexl teixl lei cexr arddeirnga a, nia giexl teixl lei a ngo leil gger yuex. ¹⁶ Nael eilcar a, ngo nia leil ddarzi mel biar gger a, holbbaexl nia dder ngo leil nia leil vuxryixrsu ca i mal gger a ngo?

¹⁷ Sulmulsu yarjjar hal mel nia leil einezeixl hoxrcixl a mel, nia leil seir lol nr nga. Yaa nia leil ngo dax bbe kae gger niazzir a mel, nia leil yaa dax cirgo a zabbar seirseir a Yoxrtaexl su ddei leiddur dax bei mae lol.

¹⁸ Ca mel seirseir bei a, si leil einezeixl hoxrcixl a mel dder seir. Nael ngo nia dax cirgo a hher dae car a lar bei nr nga a nei, bei zei si nia. ¹⁹ Ngo ddei aniux mel, ngo yoxl nia leil weix a, ssormaer mel aniux xiu car a sael a no dae a; hherdder nia Zidu dax ciryoxr a loxr hane zzeze ci.

²⁰ Ngo nia leil zoxrzixr, arsae bei nia lei nr saexl. Yel ngo eilcar a dder nia dax cirgo a hher dae loxia halae ddar eil yox te nr ssa.

^j**4:12** *ngo nia leil qiuxr, nia lei ngo dax ciryoxr a loxr nia* Barloxr ddei yilsi mel dder yaa Barloxr sael a zeixleixr cirza-hanga leiddur mel dax bei nr mae, Zidu leil lar ddarzzi.

Xiaxljiaxr Nei Sala Leil Bir Dae A Biar

²¹ Lixlifaxr dax bei mae dae meixr su ca mel, ngo nia leil arleixr biex: Lixlifaxr mel azo yilsi zza nia nr saexl a ngo? ²² Arbosobo Ddei Sul ber leil vaexr dae a bbeix: Yalboxrlahar mel ssor nnel zza. Cir ddei a nael, ssormaer zebol hal ddei xiu; cir ddei a nael, armael lozza ssormaer hal ddei xiu. ²³ Ssormaer zebol ddei xiu hal ddei mel, ca mel xiar dae mel dax zox dae a xiu lalnga, nael armael lozza ssormaer hal ddei xiu ddei mel, Arbosobo bbeix har zaxr ddei dax zox dae a xiu arddeir a.

²⁴⁻²⁵ Eil ddei mel hherdder bir dae a bbeix dae sael a nga: Arbosobo mel yar ddei cassor-worssor dax nr boxl bbeix har zaxr a. (Bbeix har zaxr dae cir ddeir a nael Arbosobo Lixlifaxr gger, cir ddeir a nael Arbosobo seirseir meixl gger.) Ssormaer eil nnel mel dder bbeix har zaxr dae hal nr boxl leil bbeix dae arddeir a. Cir ddei a nael Xiaxljiaxr mi. Cir ddeir a nael Sala mi.^k Xiaxljiaxr mel dder Arbosobo Alaboxr mermi Xinaer worga leil Lixlifaxr gger hal ddei leil bbeix arddeir a. Yar xiu teixl lei ssor mel zebol. Yar mel dder eilleix Yiluxlsaler zzi ddei leil bbeix arddeir a. Yiluxlsaler zzi gga ca mel Lixlifaxr dax bei mae dae a, yaa lei Xiaxljiaxr sael a zebol mu. ²⁶ Nael merhhexr gga ddei Yiluxlsaler zzi ddei mel Sala sael a armael lozza. Sala mel niul ddei ama a. ²⁷ Arbosobo Ddei Sul ber leil vaexr dae a bbeix:

“Aniuxniar nr goxr, aniux xiu nr goxr ssormaer ddei,
ni ggese nia.

Ni aniux xiunono nr goxr bbeixarnar,
halae worcixl-worni ae dae a ggese nia.

Capor yar dax nr naer dae ssormaer hal ddei mel

^k4:24-25 *Cir ddei a nael Xiaxljiaxr mi. Cir ddeir a nael Sala mi.*

Cuaxlsixljil Sul 15, 16, 21 Yalboxrlahar, Xiaxljiaxr, nei Sala leil biar dae.

bir capor yar dax naer ssormaer hal ddei leil
aniux xiu miur leixl nia,”^l

eine bbeix a.

²⁸ Arzzi-nimar arzzi-nimo mel, nia Arbosobo ddei ssormine loxr a mel, Lixlfaxr dax zox dae nr nga a nei, Arbosobo bbeix har zaxr goxr mel dax zox dae a loxr arddeir a. Hherdder Yirsar dax ciryoxxr a nga. ²⁹ Halleix, ca mel xiar dae ddei dax zox dae a xiu teixl lei ssor ddei mel, Arbosobo ddei Xiu ddei xiar dae a xiu teixl lei ssor ddei leil bixr.^m Eilleix lei ciryoxxr a nga. ³⁰ Nael Arbosobo Ddei Sul ber leil arsae bbeix dae neil? Bbeix: “Ssormaer zebol ddei xiu teixl lei ssor ddei mel armael lozza ssormaer hal ddei xiu teixl lei ssor ddei dax cirgo a cirza-hanga mel li wo nr ddo. Yel yar nei yar ssor ddei leil ggaxr teixl gger ssi,”ⁿ eine bbeix a.

³¹ Arzzi-nimar arzzi-nimo mel, niul mel ssormaer zebol ddei aniux nr nga a nei, armael lozza ssormaer hal ddei ddei aniux a.

5

Yisu Leil Ddarzzi Su Mel Armael Lozza

¹ Zidu niul leil Lixlfaxr gga jiuxl teixl lei a mel, niul leil armael lozza lol niazzir a nga arddeir a. Yel nia velver a ddarzzi zei si nia, zeixleixr zebol mu su mel bil dae lorleix ddei bil jjixr nr ddo.

² Ngo mel nia ddei sulmulsu Barloxxr a. Ngo nia leil bbeix gger: nia zeixleixr Lixlfaxr dax bei mae dae a, gelir bei arddeirnga a, Zidu dder nia dax seirggiebbær cirdoxxr lei nr zza a. ³ Ngo nia leil zeixleixr ar boxl

^l4:27 Yirsaexlyal Sul 54:1 leil vaexr dae.

^m4:29 Cuaxlsixljil Sul 21:8-21 leil ssor eil nr nel leil biar dae.

ⁿ4:30 Cuaxlsixljil Sul 21:10 leil vaexr dae.

bbeix gger, gelir bei su ca cirddeir-hanga lei Lixlfaxr maelmaerjjia dax bei mae jjia nia. ⁴ Lixlfaxr leil koxl dae a, Arbosobo nia leil zuixl nr zza ca i mal gger lol niazzir su ca mel, nia eine bei a mel dder Zidu dax bbe kae a; nia Arbosobo nia leil seirseir meixl gger dae mel nr li a. ⁵ Niul mel Arbosobo ddei Xiu ddei leil koxl dae nei Yisu Zidu leil ddarzzi a saelnei Arbosobo niul leil zuixl nr zza i mal gger. Eil ddei mel dder niul yarzisael li wo loxia dae ddei nga a. ⁶ Niul Yisu Zidu leil ddarzzi ho a mel, gelir bei goxr bbeixsael bei nr goxr lei nr zzi a. Niul yar leil ddarzzi a, ca leil perniar ssi eil ddei larnei zoxlyoxl.

⁷ Nia mel zoxlzoxl a lei yarzi bei seir dae mar! Nael eilboxl arseir nia leil bbiur gex dae a, ddarzi mel dax bei nr mae lol a leir? ⁸ Nia leil eine bei lol su ddei mel, nia leil tiur teixl lei su ddei nr nga. ⁹ Bir dae a bbeix, miljiazi cirdoxr a nga lei aba bex cirtaex-lorbba leil faex du lei lol var.^o ¹⁰ Seirpor leil koxl dae a ngo ddarzzi, nia nixmox zzar mel ngo dax ciryoxr a xiar dae. Nael nia leil co su ca mel arseir nga zzorbbeixlei, Arbosobo yar leil faxr nia. ¹¹ Arzzi-nimar arzzi-nimo mel, ngo halae ca leil gelir bei nia biar gger dae seir arddeirnga a mel, ca mel dder ngo leil bixr nr var a mar! Ngo yaa leil Zidu sixrzixljiaxl leil si a biar nr gger arddeirnga a mel, yaa dder ngo leil vuxryixr ddu nr zza mar! ¹² Ngo mel nia leil co lei su ca hal mel yaa armael ddei armael leil caer pixl gger loxia.

¹³⁻¹⁴ Arzzi-nimar arzzi-nimo mel, “Nia ca leil perniar a, armael leil perniar sael a perniar” arddeirnga a, nia dder Lixlfaxr leil miardal dae mel bei ci a. Arbosobo nia leil tiur teixl lei a, nia leil armael lozza lol a, nia Lixlfaxr dax bei mae nr ssa a. Nael eine nga bbeixarnar a, nia armael nr seir xiar dae mel sael a bei ssi nr ddo. Nia zzicarzzi leil perniar a,

^o**5:9** *Miljiazi cirdoxr a nga lei, aba bex cirtaex-lorbba leil faex du lei lol var* Yilsi mel dder ca mel nr seir cirdoxr a mul gger lei, yar nixixl goxr dae maelmaerjjia leil lei ke var.

zzicarzzi leil visser nia. ¹⁵ Nia fadae nia, nia yirvu-nilhax mel sael a zzi leil kexl, zzi leil zzor arddeirnga a mel, nia maelmaerjjia lei gge var, mier var.

Arbosobo Ddei Xiu Ddei Leil Koxl Dae A Nixixl Goxr

¹⁶⁻¹⁷ Nia armael nr seir xiar dae hal mel, Arbosobo ddei Xiu ddei leil dir; ciryoxr a nga, Arbosobo ddei Xiu ddei lei nia armael nr seir xiar dae mel leil dir. Eine nga a mel, nia dder armael nr seir xiar dae hal mel sael a bei nr var. Yel ngo nia leil bbeix gger, nia Arbosobo ddei Xiu ddei nia leil mul gger dae mel dax bei mae dae a dder nia nr seir bei ssi nr var. ¹⁸ Nia Arbosobo ddei Xiu ddei nia leil mul gger dae mel dax bei mae dae arddeirnga a, Lixifaxr mel dder nia leil guaxr nr gex dae a.

¹⁹ Nixmox zzar nr seir xiar dae a ha bei teixl lei mel dder: capor ssormaer zzi dax kerjia, capor maerssor nr loxr seir zzi dax naer, nixmox zzar sei-nr-beix, capor ssormaer zzi dax yarzi gexrddo bei, ²⁰ bbex leil zi, neir bei, ca leil vuxryixr, ca dax zex, si leil nixnox, sirzzi, armael leil lar guaxr, ca dax hoxr lal nr ddo, armael ddei armael ar cir bei meixr, ²¹ nixnox, zzipbaer ddayixr nei zzor ji dda ji a capor ssormaer buxlguaxr-laxlsixr bei cirza-hanga eil mel nga a. Ngo halleix dder zabbar seilseir a nia leil bbeix gger goxr ho a; eilcar yoxl zeixleixr zabbar seilseir a nia leil bbeix gger: eil mel bei su ca hazza mel dder arsaebeilei Arbosobo ddei goxr gga ddir nr cexr.

²²⁻²³ Nael Arbosobo ddei Xiu ddei dax bei mae dae a mel dder eine bei var: ca leil perniar, nixmox zzar ggese, nixmox zzar zzaso, ssertexr zza, ca leil zoxlnixr, nixmox seir, ddarzziddo, ddar te a norlixlix a te nei azo bei lei qiulqiur a bei, armael leil guaxr ssei xie. Eil mel hherdder Arbosobo ddei Xiu ddei ca leil saer niar teixl lei lol sael a nga. Lixifaxr leil lei eil mel bei nr ddo nr bbeix. ²⁴ Yisu Zidu ddei ca hazza mel dder nixmox zzar nr seir xiar dae a zuixl bei meixr hal mel sixrzixljiaxl ddei

leil diexr gex gger ho a, zuixl mel zeixleixr yaa leil guaxr nr gex dae a.

²⁵ Arbosobo ddei Xiu ddei niul leil olga sixl gger a, yel niul nixixl goxr a mel, Arbosobo ddei Xiu ddei mul gger dae mel dax bei mae dae nia.^p

²⁶ Niul mel col nr ddo, zzicarzzi leil sirzzi lol nr ddo, zzicarzzi leil nixnox nr ddo.

6

Zzicarzzi Leil Beijjiu

¹ Arzzi-nimar arzzi-nimo mel, nia ca mel gga arseir zuixl bei dae arddeirnga a, nia Arbosobo ddei Xiu ddei leil koxl dae su ca mel mia a dder ddar norlixlix mel sser a, yar bei nr hoxr yar leil bbeix gger nia. Yel yar leil zeixleixr bei lol nr ddo a. Nael nia armael lei fadae nia. Nr nga a, yar sael a zuixl bei ssi leilei. ² Nia ca mel gga arseir goxr sol dae nei cixddu zza a mel, nia zzicarzzi leil Beijjiu nia. Eine nga a mel, nia Zidu ddei Lixlfaxr bei ci a. ³ Arseir zzir dae a yar bir kebal ca leil sexr, nael nga zzael yar azo lei nr suax, yar dder armael ddei armael leil fur dae lalnga. ⁴ Nia ca cirddeir-hanga lei armael bei dae mel arsaesael nga dae arleixr i nia. Nia seirseir bei dae arddeirnga a dder kuar ddu zza a; nael si dax bir ssi nr ssa. ⁵ Ca cirddeir-hanga lei armael bei mibbe mel bei nia.

⁶ Nia, nia ddei cirza-hanga seirseir mel nia leil Arbosobo ddei ddar mulggersu ca hal mel leil bbe gger mibbe.

⁷ Nia armael ddei armael leil fur nr ddo: Arbosobo leil i zei nr ddo. Bir

^{p5:25} *Arbosobo ddei Xiu ddei niul leil olga sixl gger a, yel niul nixixl goxr a mel, Arbosobo ddei Xiu ddei niul leil mul gger dae mel dax bei mae dae nia. Sul cirberber a “Niul Arbosobo ddei Xiu ddei leil koxl dae a nixixl goxr a mel, yel niul dder Arbosobo ddei Xiu ddei niul leil mul gger dae mel dax bei mae dae nia,” eine bbeix.*

dae a bbeix, ca mel azo dae ji a mel dder azo se. ⁸ Armael nr seir xiar dae mel dax zox dae a silmo xiu ji a mel, arddolcar a se xixl wo ddei mel hherdder cirse-cirsil lei Arbosobo dax bbe kae nia. Nael Arbosobo ddei Xiu ddei dax zox dae a, silmo xiu ji a mel, arddolcar a se xixl wo ddei mel hherdder cirse-cirsil lei Arbosobo dax cirgo a hher nia. ⁹ Niul seirseir bei a, nixmox bbiex nr ddo. Niul bei zei si arddeirnga a, nixixl ddei ci a mel dder seirseir se wo ddo. ¹⁰ Yel arddolcar lei ca leil beijjiu cexr a mel, niul dder ca maelmaerjjia leil beijjiu nia, Yisu leil ddarzzi su ca mel leil gielgiel beijjiu nia.

Barloxr Yaa Leil Quex, Yaa Leil Seir Lol

¹¹ *Nia i ddo a! Sul vaervaermo vaexr dae eil mel mel, ngo armael nia leil vaexr gger.*

¹² Si yaa leil kuar gger lol niazzir su ca hal mel mel, nia leil ddoddo-nrddo gelir bei lol niazzir. Yaa eine bei a mel, yaa Zidu ddei sixrzixljiaxl leil weix a si yaa leil bixr leilei a gexr a nga arddeir a.⁹

¹³ Gelir bei goxr su ca hal mel, yaa armael lei Lixlfaxr dax bei nr mae dae mar. Nael yaa nia leil gelir bei lol a mel, nia gelir bei goxr eine kuar niazzir a nga arnar a. ¹⁴ Ngo kebal hal mel leil nr kuar, Seirpor Yisu Zidu ddei sixrzixljiaxl ddei leil lar kuar. Ngo mel middurbbor ca mel zzir dae a zoxlyoxl hal mel leil nr i. Middurbbor ca mel mel ngo zzir dae a zoxlyoxl hal mel leil nr i. Ngo dax bbeix ci a mel, middurbbor ddei mel sixrzixljiaxl leil diexr gex dae ho sael a nga. Middurbbor ca mel dax bbeix ci a mel, ngo mel sixrzixljiaxl leil diexr gex dae ho sael a nga. ¹⁵ Gelir bei goxr bbeixsael bei nr goxr lei nr zzi. Zoxlyoxlyoxl ddei mel dder niul ca sixl

⁹**6:12** Ca eil mel mel si yaa leil bixr lei a gexr a Zidu sixrzixljiaxl leil si eil ddei leil ddarzzi a saelnei jiuxl wo ddo, eine mul gger nr bel. Yaa ca mel leil gelir bei nia eine saelnei jiuxl wo ddo, eine mul gger.

loxr a. ¹⁶ Ngo bbeix dae eil mel dax bei mae dae su ca hazza, hherdder Arbosobo ddei cassor-worssor mel, Arbosobo nia leil nixmox zzaso lol nia, zoxlnixr lol nia!

¹⁷ Ngo mel Yisu leil weix a, ggecir leil bazir niar dae ho a; hormo goxr sol a. Yel eine zzezze arseir lei ngo leil tor nr cor lei hor!

¹⁸ Arzzi-nimar arzzi-nimo mel, niul ddei Seirpor Yisu Zidu nia leil cirza-hanga seirseir meixl gger dae mel nia dax^s hher ji dae lol nia. Amae!

^s**6:18** *nia dax* Xilaxl ddar bbeix “nia ddei xiu dax.”